

四庫全書

史部

欽定四庫全書

繹史卷六

靈壁縣知縣馬驥撰

少皞紀

漢書少昊帝考德曰清清者黃帝之子清陽也是其子
孫名摯立土生金故為金德天下號曰金天氏周饒其

樂故易不載序於行

河圖大星如虹下流華渚女節意感生白帝朱宣宋符瑞志帝摯

少昊氏母曰女節見星如虹下流華渚既而夢接意感生少昊帝王世紀少昊帝名摯字青陽姬姓也即圖識所謂白帝朱宣者也故稱少昊號金天氏

拾遺記少昊以金德王母曰皇娥處璇宮而夜織或乘
桴木而晝遊經歷窮桑滄茫之浦時有神童容貌絕俗
稱為白帝之子即太白之精降乎水際與皇娥讌戲奏
嬋娟之樂游漾忘歸窮桑者西海之濱有孤桑之樹直
上千尋葉紅堪斂萬歲一實食之後天而老帝子與皇
娥泛於海上以桂枝為表結薰茅為旌刻玉為鳩置於
表端言鳩知四時之候故春秋傳曰司至是也今之相
風此之遺象也帝子與皇娥竝坐撫桐峯梓瑟皇娥倚

瑟而清歌曰天清地曠浩茫茫萬象迴薄化無方治天
蕩蕩望滄滄乘桴輕漾著日傍當其何所至窮桑心知
和樂說未央俗謂遊樂之處為桑中也白帝子答歌四
維八埏眇難極驅光逐影窮水域璇宮夜靜當軒織桐
峯文梓千尋直伐梓作器成琴瑟清歌流暢樂難極滄
湄海浦來棲息及皇娥生少昊號曰窮桑氏亦曰桑丘
氏

○帝子聖母而有桑中之戲清歌七
言乃見軒皇之世乎子年之妄極矣

帝王世紀少昊帝是為玄囂降居江水有聖德邑于窮

桑以登帝位都曲阜故或謂之窮桑

○公羊疏云依八代記少昊十二而

冠

古史考少昊以金德王故號金天氏或曰宗師太皞之道故曰少皞少昊之樂曰九淵

漢書世經春秋昭公十七年郊子來朝傳曰昭子問少昊氏鳥名何故對曰吾祖也我知之矣昔者黃帝氏以雲紀故為雲師而雲名炎帝氏以火紀故為火師而火名共工氏以水紀故為水師而水名太昊氏以龍紀故

為龍師而龍名我高祖少昊摯之立也鳳鳥適至故紀
於鳥為鳥師而鳥名言郟子據少昊受黃帝黃帝受炎
帝炎帝受共工共工受太昊故先言黃帝上及太昊稽
之於易炮犧神農黃帝相繼之世可知

宋符瑞志登帝位有鳳凰之瑞

○杜氏左傳注云鳳鳥知天時故以名厯正之官玄鳥
以春分來秋分去伯趙以夏至鳴冬至止青鳥以立春
鳴立夏止丹鳥以立秋來立冬去上四鳥皆厯正之屬
官祝鳩孝故為司徒主教民鵙鳩驚而有別故為司馬
主法制鳴鳩平均故為司空平水土爽鳩驚故為司寇
主盜賊鷦鷯春來冬去故為司事雉有五種西方曰鷩
雉東方曰鷩雉南方曰翟雉北方曰鵒雉伊洛之南曰
翬雉扈有九種春扈鵙鷦鷯夏扈竊玄秋扈竊藍冬扈竊

黃棘扈竊丹行扈咩咩雷扈嘖嘖桑扈竊脂老扈
鷄鷄以九扈為九農之號各隨其宜以教民事

拾遺記少昊以主西方一號金天氏亦曰金窮氏時有
五鳳隨方之色集於帝庭因曰鳳鳥氏金鳴於山銀湧
於地或如龜蛇之狀乍似人鬼之形有水屈曲亦如龍
鳳之狀有山盤紆亦如屈龍之勢故有龍山龜山鳳水
之目也亦因以為姓末代為龍丘氏蛇丘氏

尸子少昊金天氏邑於窮桑日五色下照窮桑

田俅子少昊都于曲阜韃韃毛人獻其羽裘 赤燕一

羽飛集少昊氏之戶遺其丹書

帝王世紀在位百年而崩

○外紀在位八十四年壽百歲紀年或曰名清不居帝

位帥鳥師居西方以鳥紀官春秋命厯序少昊傳八

世山海經少昊生倍伐倍伐處緡淵少昊生般般

是始為弓矢有人一目當面中生一曰是威姓少昊

之子食黍東海之外大壑少昊之國少昊孺帝顓頊

於此棄其琴瑟

史記本紀曰黃帝之子曰玄跼是為青陽青陽降居

江水不得在位是不然青陽與玄跼皆黃帝之子非

一人也青陽即少昊氏也少昊之居西方蓋在蚩尤

既滅之時其登帝位也乃在黃帝升遐之後何以明
之周書曰帝執蚩尤殺之于中冀乃命少昊請司馬
鳥師以正五帝之官故名曰質質即少昊之名摯是
也摯有盛德嗣位為帝都于曲阜曲阜非西方也明
矣紀年曰少昊不居帝位帥鳥師居西方以鳥紀官
是又不然命官天子之事也方少昊之宅西所任者
侯伯之職所司者一方之治及其立為帝也鳳鳥適
至始因之以紀官使少昊而終於西方將已亦在雲

師雲名之列又何由鳩雉扈農設官備物哉周書所稱亦未可盡據矣古史考曰宗師太昊之道故曰少昊是又不然少昊其初立國之名也猶堯之為唐舜之為虞三代之為夏商周皆先有其號及有天下因而不改豈其黃帝之子作述一堂乃近舍軒后之法遠修戲皇之道哉問者曰少昊之為帝信矣然則五帝德何以不載曰帝德因宰我之問而及之也少昊繼緒承家德協黃帝是以宰我未問孔子亦不言非

謂其不帝也然則繫辭何以不序曰易序伏羲氏以
來制作之君少昊顓頊帝嚳皆無所制作故統言黃
帝堯舜略不備舉非謂其皆不帝也史見玄黿之降
處江水也則以為青陽不帝紀年見少昊之以鳥名
官也則以為帥鳥師居西方世紀見少昊為金行之
帝也則以為玄黿自江水登帝位是皆恍惚不得其
實故備論焉以為五帝之首

繹史卷六

欽定四庫全書

史部

繹史卷七至十三

詳校官檢討

臣羅國俊

編修

臣裴謙履勘

覆校官博士

臣劉光第

校對官中書

臣陳林

謄錄監生

臣熊萬軒

篆字謄錄監生

臣蕭永和

欽定四庫全書

經史卷七

靈璧縣知縣馬驥撰

高陽紀

大戴禮記黃帝產昌意昌意產高陽是為帝顓頊昌意

娶於蜀山氏蜀山氏之子謂之昌濮氏產顓頊

山海經黃帝妻

雷祖生昌意昌意降處若水生韓流韓流擢首謹耳人而豕喙鱗身渠股脉止取淖子曰阿女生顓頊○韓流

或作

乾荒

帝王世紀帝顓頊高陽氏黃帝之孫昌意之子姬姓也

母曰景僕蜀山氏女為昌意正妃謂之女樞金天氏之

末女樞生顓頊於若水

詩含神霧瑤光如蜺貫月正白感女樞生顓頊宋符瑞志女

樞見瑤光之星貫月如虹感已於幽房之宮生顓頊於若水首戴干戈有聖德白虎通顓頊戴午是謂清明

發節移度盖象招瑤潛夫論赤帝顓頊其相駢幹○新論作駢骸拾遺記昌意出河濱遇黑龍負玄玉圖

時有一老叟謂昌意云生子必叶水德而王至十年顓頊生手有文如龍亦有玉圖之象其夜昌意仰視天北

辰下化為老叟昌意雖黃帝之嫡以德劣降居若水為諸侯及

顓頊生十年而佐少昊二十而登帝位

呂氏春秋嘗得學黃帝之所以誨顓頊矣爰有大圜在

上大矩在下汝能法之為民父母

嚮子昔者帝顓頊年十五而佐黃帝二十而治天下其
治天下也上緣黃帝之道而行之學黃帝之道而常之
帝王世紀平九黎之亂以水事紀官南正重司天以屬
神北正黎司地以屬民於是民神不雜萬物有序始都
窮桑徙商丘

漢書顓頊帝春秋外傳曰少昊之衰九黎亂德顓頊受
之廼命重黎蒼林旨意之子也金生水故為水德天下

號曰高陽氏周譽其樂故易不載序於行

古史考顓帝以孟春正月為元其時正朔立春五星會于天歷營室天曰作時地曰作昌人曰作樂鳥獸萬物莫不應和故顓帝聖人為歷宗也

呂氏春秋帝顓頊生自若水實處空桑乃登為帝惟天之合正風乃行其音若熙熙淒淒鏘鏘帝顓頊好其音乃令飛龍作效八風之音命之曰承雲以祭上帝乃令鰥先為樂倡鰥乃偃浸以其尾鼓其腹其音英

帝王世紀
命飛

龍效八風之音作樂五英以祭
上帝 樂緯顓頊之樂曰五莖

新書帝顓頊曰至道不可過也至義不可易也是故以
後者復迹也故上緣黃帝之道而行之學黃帝之道而
賞之加而弗損天下亦平也 顓頊曰功莫美於去惡
而為善罪莫大於去善而為惡故非吾善善而已也善
緣善也非惡惡而已也惡緣惡也吾日慎一日其此已
也

淮南子帝顓頊之法婦人不辟男子於路者拂之於四

達之衢

史記帝顓頊高陽者黃帝之孫而昌意之子也靜淵以有謀疏通而知事養材以任地載時以象天依鬼神以制義治氣以教化潔誠以祭祀北至于幽陵南至于交趾西至于流沙東至于蟠木動靜之物小大之神日月

所照莫不砥屬

真誥顓頊父君弱水之鄉頊身陶七河之津是為玄黃也仗萬靈以信順監衆

神以導物役御百氣召致雷電於是乘結元之輦周旋八外諸有洞臺之山陰宮之丘皆移安息之石封而鎮之鑄羽山之銅為寶鼎各獻以一於洞山神峯不獨句曲一山而已拾遺記顓頊居位奇祥衆祉莫不總集

不稟正朔者越山航海而皆至也帝乃捐四方之靈犀
后執珪以禮百辟各有班序受文德者錫以鐘磬受武
德者錫以干戈有浮金之鐘沈明之磬以羽毛拂之則
聲振百里石浮於水上如萍藻之輕取以為磬不加磨
琢及朝萬國之時乃奏含英之樂其音清密落雲間之
羽鯨鯢游湧海水恬波有曳影之劍騰空而舒若四方
有兵此劍則飛起指其方則尅伐未用之時常於匣裏
如龍虎之吟 溟海之北有勃鞞之國人皆衣羽毛無
翼而飛日中無影壽千歲食以黑河水藻飲以陰山桂
脂憑風而翔乘波而至中國氣暄羽毛之衣稍稍自落
帝乃更以文豹為飾獻黑玉之環色如淳漆貢玄駒千
疋帝以駕鐵輪騁勞殊鄉絕域其人依風泛黑河以旋
其國也 博物志蒙雙民昔高陽氏有同產而為夫婦
帝放之此野相抱而死神鳥以不死草覆之七年男女
皆活同頸二頭四手是蒙雙民 拾遺記閼河之北有
紫桂成林其實如棗羣仙餌焉韓終採藥四言詩曰閼

河之桂實大如棗得而食之後天不老

帝王世紀顓頊在位七十八年年九十八歲歲在鶉火

而崩葬東郡頃丘廣陽里

皇覽顓頊冢在東郡濮陽頃丘城門外廣陽里中

山海

經漢水出鮒魚之山帝顓頊葬于陽九嬪葬于陰四蛇衛之大荒之中河水之閒附禺之山帝顓頊與九嬪

葬焉爰有鵠久文貝離瑜鸞鳥鳳鳥大物小物有青鳥琅鳥玄鳥黃鳥虎豹熊羆黃蛇視肉璿瑰瑤碧皆出衛

山於

史記帝顓頊生子曰窮蟬顓頊崩而玄囂之孫高辛立

是為帝嚳

春秋命厯序顓頊即高陽氏傳二十世三百五十歲或云傳十世

大戴禮記顓頊產老童老童產重黎及吳回吳回氏產
陸終陸終氏娶於鬼方氏產六子孕而不粥三年啓其
左脅六人出焉其一曰樊是為昆吾其二曰惠連是為
參胡其三曰錢是為彭祖其四曰萊言是為云鄩人其
五曰安是為曹姓其六曰季連是為芊姓昆吾者衛氏
也參胡者韓氏也彭祖者彭氏也云鄩人者鄭氏也曹
姓者邾氏也季連者楚氏也

史記高陽生稱稱生卷章
卷章生重黎吳回吳回生

陸終陸終生子六人坼剖而產焉其長一曰昆吾二曰
參胡三曰彭祖四曰會人五曰曹姓六曰季連芊姓楚

其後也昆吾氏夏之時嘗為侯伯桀之時湯滅之彭祖氏殷之時嘗為侯伯殷之末世滅彭祖氏風俗通陸終娶于鬼方氏是謂女嬪蓋孕而三年不育啓其左脅三人出焉啓其右脅三人又出焉山海經顓頊生老童老童生祝融祝融生太子長琴是處搖山始作樂風顓頊生老童老童生重及黎帝令重獻上天令黎卬下地下地是生噎處於西極以行日月星辰之行次有人名曰吳回奇左是無右臂世本彭祖姓篋名鏗在商為守藏史在周為柱下史年八百歲○論語疏引神仙傳彭祖者顓頊之玄孫也殷末已七百六十七歲而不衰老少好恬靜不卹世務不營名譽不飾車服唯以養生治身為事王令采女問道於彭祖彭祖曰欲舉形登天上補仙官當用金丹其次當愛養精神服藥草可以長生吾遺腹而生三歲而失母遇犬戎之亂流離西域百有餘年加以少枯喪四十九妻失五十四子數遭憂患和氣折傷恐不度世乃去不知所之其後七

十餘年間人於流沙之國西見之○文多不具錄列
仙傳彭祖帝顓頊之孫陸終氏之中子歷夏至殷末八
百餘歲常食桂芝善導引行氣歷陽有彭祖仙室前世
禱請風雨莫不輒應易林彭祖九子據德不殆南山
松栢長受嘉福楚辭注彭鏗好和滋味善斟雉羹能
事帝堯帝堯美而饗食之以壽考彭祖至八百歲猶自
悔不壽恨枕高而眠遠也○莊子注云杖晚而唾遠
山海經有國名曰淑士顓頊之子有人焉三面是顓
頊之子三面一臂三面之人不死有國曰顓頊生伯
服食黍有季禺之國顓頊之子食黍有國曰中輻
顓頊之子食黍有叔歆國顓頊之子黍食使四鳥虎
豹熊羆有人有翼名曰苗民顓頊生驩頭驩頭生苗
民釐姓食肉○按驩兜苗民傳不言父子亦非高陽之
後此疑脫誤搜神記昔顓頊氏有三子死而為疫鬼
一居江水為瘧鬼一居若水為魍魎鬼一居人宮室善
驚人小兒為小鬼於是正歲命方相氏帥肆儺以驅疫

鬼

顓頊黃帝之孫而少昊氏兄弟之子也據史則嗣黃
帝而立據世紀則繼少昊而立少昊一代既不可泯
則世紀為可信乎然史之失在於輕信而多疎世紀
之失在於牽合而附會顓頊之佐黃帝與黃帝之誨
顓頊見於鬻子呂覽皆近古之書也世紀牽於二十
登位之說則謂其生於金天末年十年而佐少昊如
以鬻子未可信將二十治天下之言亦竝可廢胡為

兩歧其說吾不能為之解也最難知者帝王之譜系最無徵者上世之年紀史叙昌意於玄囂之下何由知其為黃帝之嫡昌意降處若水亦猶帝摯嗣位堯受唐封封建之來久矣何由知其德之劣史自三代以上止表其世共和以下始紀其年年固有不可強知也必以顓頊為在位七十八年年九十八歲則不得不就二十而曲為之說此皇甫氏之蔽也然則顓頊之年果若何曰是固不可知也抑嘗考之黃帝在

位已百年矣少昊嗣之未必復有八十四年之久或者顓頊及見黃帝由此登庸任治其治天下惡知不在軒昊之時舜禹之功成於唐世奚必二十而登帝位哉帝之有天下也其道則緣乎黃帝其功則在乎為善而去惡其德靜淵䟽通其治象天任地其法男女有別命官以民事而五正咸得其職平九黎之亂命重黎絕地天通神人無復雜糅民用安生休祥滋至化被四海莫不砥屬以斗杓建寅為厯元四時以

正五星聚室萬物應和後世法而行之久無差違也
作承雲之樂陰陽以調用享上帝亶乎承五運之終
立帝德之極載在傳記者歷歷可考如此至其登位
之蚤晚享年之多寡姑闕疑焉

繹史卷七

欽定四庫全書

繹史卷八

靈壁縣知縣馬驥撰

高辛紀

史記帝嚳高辛者黃帝之曾孫也高辛父曰蟠極蟠極父曰玄囂玄囂父曰黃帝自玄囂與蟠極皆不得在位至高辛即帝位高辛於顓頊為族子

大戴禮記黃帝產玄囂玄囂產蟠極蟠極產高辛是為

帝嚳

白虎通帝嚳駢齒上法月參康度成紀取理陰陽春秋元命苞帝嚳戴干是謂清明○新論作戴

肩帝王紀云
譽母無聞焉

帝王世紀帝譽高辛氏姬姓也其母生見其神異自言
其名曰爰鹵鹵有聖德年十五而佐顓頊三十登帝位
都亳

鬻子昔者帝譽年十五而佐帝顓頊三十而治天下其
治天下也上緣黃帝之道而明之學帝顓頊之道而行
之

新書帝譽曰緣道者之辭而學為已緣巧者之事而學

為巧行仁者之操而學為仁也故節仁之器以修其躬
而身專其美矣故上緣黃帝之道而明之學帝顓頊之
道而行之而天下亦平也 帝嚳曰德莫高於博愛人
而政莫高於博利人故政莫大於信治莫大於仁吾慎
此而已也 尚書璇璣鈴帝嚳以
上朴略有象難傳
帝王世紀以人事紀官故以勾芒為木正祝融為火正
蓐收為金正玄冥為水正后土為土正是五行之官分
職而治諸侯於是化被天下

史記重黎為帝嚳高辛居火正甚有功能先融天下帝
嚳命曰祝融共工氏作亂帝嚳使重黎誅之而不盡帝
乃以庚寅日誅重黎而以其弟吳回為重黎後復居火
正為祝融

漢書帝嚳春秋外傳曰顓頊之所建帝嚳受之清陽玄
器之孫也水生木故為木德天下號曰高辛氏周舉其
樂故易不載周人禘之

史記高辛生而神靈自言其名普施利物不於其身聰

以知遠明以察微順天之義知民之急仁而威惠而信
修身而天下服取地之財而節用之撫教萬民而利誨
之歷日月而迎送之明鬼神而敬事之其色郁郁其德
嶷嶷其動也時其服也士帝嚳溉執中而徧天下日月
所照風雨所至莫不從服

潛夫論帝嚳代顓頊氏其號高辛厥質神靈德行祇肅迎

送日月順天之則能敘三辰以周民作樂六英

呂氏春秋帝嚳命咸黑作為聲歌九招六列六英有倕
作為鼗鼓鍾磬吹苓管塤箎鞀椎鍾帝嚳乃令人抃或

鼓鼙擊鐘磬吹苓展管簫因令鳳鳥天翟舞之帝嚳大

喜乃以康帝德

帝王世紀作樂六莖以康帝德宋符瑞志使鼓人拊鞀鼓擊鐘磬鳳凰鼓翼

而舞

樂緯帝

嚳之樂曰六英

玄中記高辛時犬戎為亂帝曰有討之者妻以美女封

三百戶帝之狗曰槃瓠去三月而殺犬戎以其首來帝

以女妻之不可教訓浮之會稽東海中得地三百里封

之生男為狗女為美人是為犬封氏

搜神記高辛氏有老婦人居於王宮

得耳疾醫為挑治出頂蟲大如繭婦人置於瓠籬覆之以盤俄化為犬因名盤瓠時戎吳強盛數侵邊境乃募

天下有能得戎吳將軍首者購金千斤封邑萬戶又賜以少女後盤瓠銜得一頭將造王闕王診視之即是戎吳少女聞之啓曰盤瓠為國除害此天命使然不可以女子而負約於天下從之盤瓠將女上南山入谷止於石室之中蓋經三年產六男六女自相配偶後母歸以語王王遣使迎諸男女衣服褊裋言語侏儻飲食蹲踞好山惡都王順其意賜以名山廣澤號曰蠻夷故世稱赤髀橫裙盤瓠子孫拾遺記有丹丘之國獻碼碯石以盛甘露帝德所洽被於殊方以露充於厨也碼碯石類也南方者為之勝今善別馬者死則破其腦視之其色如血者則日行萬里能騰空飛腦色黃日行千里腦色青者嘶聞數百里腦色黑者入水毛鬣不濡日行五百里腦色白者多力而怒今為器多用赤色若是人工所制者多不成器亦殊朴拙其國人聽馬鳴則別其腦色丹丘之地有夜叉駒跋之鬼能以赤馬腦為瓶盃及樂器皆精妙輕麗中國人有用者則魑魅不能逢之

世本帝嚳卜其四妃之子皆有天下元妃有邠氏之女曰姜嫄生后稷次妃有娥氏之女曰簡狄生契次妃陳鄴氏之女曰慶都生帝堯次妃訾陬氏之女曰常儀生

帝摯

○大戴禮記陳鄴作陳隆訾陬作陬訾帝王世紀又作姬訾

史記帝嚳娶陳鋒氏女生放勳娶姬訾氏女生摯帝嚳崩而摯代立

帝王世紀帝嚳在位七十年年百五歲而崩葬東郡頓

丘廣陽里

春秋命厯序帝嚳傳十世皇覽帝嚳冢在東郡濮陽頓丘城南臺陰野中山海經有

女子方浴月帝俊妻常羲生月十有二此始浴之有
羲和之國有女子名曰羲和方浴日於甘淵羲和者帝
俊之妻生十日有司幽之國帝俊生晏龍晏龍生司
幽司幽生思士不妻思女不夫食黍食獸是使四鳥
舞。帝譽名俊山海經稱帝俊是也然亦有非帝譽者
未詳其說拾遺記帝譽之妃鄒屠氏之女也女行不
踐地常履風雲游於伊洛帝乃期焉納以為妃妃常夢
吞日則生一子凡經八夢則生八子世謂之八神亦謂
八翼翼明也亦謂八英亦謂八力言其神力英明翼成
萬象億兆流其神睿焉

史記帝摯立不善崩而弟放勳立是為帝堯

帝王世紀帝摯之母於四人中班最在下而摯於兄弟

最長得登帝位封異母弟放勳為唐侯摯在位九年政微弱而唐侯德盛諸侯歸之摯服其義乃率羣臣造唐而致禪唐侯自知有天命乃受帝禪乃封摯於高辛綱。

目前編云摯荒淫無度諸侯廢之而推尊堯為天子按帝摯或崩或禪或廢諸說各不同也

帝嚳高辛氏黃帝之曾孫顓頊之族子也生而神靈嗣高陽氏為天子其嗣天子者以賢立也五帝之世以公天下為心非至德不足以治天下非得至德之人不敢授以天下是以高辛高陽咸起支封又必試

以官職故高陽十五而佐黃帝高辛亦十五而佐高陽詢事考言乃登大位故曰五帝官天下官天下者以天下為公器惟賢是擇近不嫌於傳子黃帝少昊是已外不妨於異姓堯舜是已少昊之後無足嗣帝位者而顓頊有至德顓頊之後無足嗣帝位者而嚳有至德有至德者登大位皆以其賢也非以其親也顓頊之所建帝嚳受之聰明祇肅普施利物順天取地節用愛民德化四訖享國七十年帝嚳嗣立未久

而崩而陶唐氏作矣然竊有疑焉記稱帝嚳四妃之
子以嫡也則莫如立后稷以賢則堯稷契皆其人也
不立嫡與賢而立摯豈嚳無知子之明有愛憎之私
乎非所以論嚳也或稱摯荒淫諸侯廢之或稱唐侯
盛德摯微弱而禪焉若是則堯有利天下之心諸侯
擅廢立之權尤非所以論堯也史記本紀但曰摯立
不善崩而已所謂不善者德不類邪政不理邪民不
從邪抑如書所謂有疾弗豫傳所謂弱足不良者邪

荒淫微弱皆後世揣摩之言摯之賢不肖未可以臆
度也意者帝嚳之子摯最居長當如世紀所說既而
享年不永兄終弟及外紀曰帝堯年十六即天子位
然則帝嚳之崩堯方七歲故不立堯而立摯殆以此
與

繹史卷八

欽定四庫全書

繹史卷九

靈壁縣知縣馬驥撰

陶唐紀

大戴禮記帝嚳產放勳是為帝堯

帝王世紀帝堯陶唐氏祁姓也母慶都孕十四月而生

堯於丹陵名曰放勳烏庭荷勝眉有八采豐下銳上或

從母姓伊氏

春秋合誠圖堯母慶都蓋大帝之女生於斗維之野常在三河東南天大雷電有血

流潤大石之中生慶都長大形象大帝常有黃雲覆蓋之燕食不饑年二十寄伊長孺家無夫出觀三河奄然

陰風赤龍與慶都合有娠而生堯 宋符瑞志慶都觀
於三河常有龍隨之一旦龍負圖而至其文要曰亦受
天祐眉八彩鬚髮長七尺二寸面銳上豐下足履翼宿
既而陰風四合赤龍感之孕十四月而生堯於丹陵其
狀如圖 帝堯碑赤龍負圖出慶都讀之云赤受天運
其下圖人衣赤衣鬚鬚尺餘長七尺二寸兌下豐上足
履翼星題曰赤帝起成天下寶 其先出自塊隗翼火
之精有神龍首出於常羊慶都交之生伊堯不與凡等
龍顏日角眉八彩謬自侯伯游於玄河龍龜負銜投鈴
授與然後受命 淮南子堯眉八彩九竅通洞而公正
無私一言而萬民齊 春秋元命苞堯眉八采是謂通
明歷象日月璇璣玉衡 尚書大傳堯八眉八者如八
字也 年十五而佐帝摯受封於唐為諸侯身長十尺嘗
夢天而上之故二十而登帝位都平陽

書曰若稽古帝堯曰放勳欽明文思安安允恭克讓光
被四表格于上下克明俊德以親九族九族既睦平章
百姓百姓昭明協和萬邦黎民於變時雍

史記帝堯者放勳其仁如天其知如神就之如日望之
如雲富而不驕貴而不舒黃收純衣彤車乘白馬能明
馴德以親九族九族既睦便章百姓百姓昭明合和萬
國

淮南子堯之有天下也非貪萬民之富而安人主之位



也以為百姓力征強陵弱衆暴寡於是堯乃身服節儉之行而明相愛之仁以和輯之是故茅茨不翦采椽不斷大路不畫越席不緣大羹不和粢食不穀巡狩行教勤勞天下周流五嶽豈其奉養不足樂哉舉天下而以為社稷非有利焉年衰志憫舉天下而傳之舜猶却行而脫蹠也 所以樂為人主者以其窮耳目之欲而適躬體之便也今高臺層榭人之所麗也而堯樸桷不斲素題不斲珍怪奇味人之所美也而堯糲粢之飯藜藿

之羹文繡狐白人之所好也而堯布衣揜形鹿裘御寒
養性之具不加厚而增之以任重之憂故舉天下而傳

之於舜若釋重負然

尸子人之言君天下者瑤臺九壘而堯白屋敝衣九種而堯大布宮

中中市而堯鶉居糲飯菜粥騏驎青龍而堯素車玄駒

六韜帝堯王天下之時金銀珠玉不飾錦繡文綺不

衣奇怪珍異不視玩好之器不寶滛佚之樂不聽宮垣

屋室不墜薨楠椽楹不斷茆茨徧庭不翦鹿裘禦寒布

衣掩形糲梁之飯藜藿之羹不以役作之故害民耕織

之時削心約志從事乎無為吏忠正奉法者尊其位廉

潔愛人者厚其祿民有孝慈者愛敬之盡力農桑者慰

勉之旌別淑慝表其門閭平心正節以法度禁邪偽所

憎者有功必賞所愛者有罪必罰存養天下鰥寡孤獨

賑贍禍亡之家其自奉也甚薄其賦役也甚寡故萬民

富樂而無饑寒之色百姓戴其君如日月親其君如父母

書乃命羲和欽若昊天厯象日月星辰敬授人時分命羲仲宅嵎夷曰暘谷寅賓出日平秩東作日中星鳥以殷仲春厥民析鳥獸孳尾申命羲叔宅南交平秩南訛敬致日永星火以正仲夏厥民因鳥獸希革分命和仲宅西曰昧谷寅饒納日平秩西成宵中星虛以殷仲秋厥民夷鳥獸毛毨申命和叔宅朔方曰幽都平在朔易日短星昴以正仲冬厥民隤鳥獸氄毛帝曰咨汝羲暨

和暮三百有六旬有六日以閏月定四時成歲允釐百

工庶績咸熙

論衡堯候四時之中命羲和察四星以占時氣山海經注羲和蓋天地始生主日

月者也故啟筮曰空桑之蒼蒼八極之既張乃有夫羲和是主日月職出入以為晦明又曰瞻彼上天一明一晦有夫羲和之子出于陽谷故堯因此而立羲和之官以主四時其後世遂為此國春秋文曜鉤唐堯即位羲和立象儀尸子造歷數者羲和子也

古今注堯設誹謗之木今之華表木也以橫木交柱頭

狀若花也形似桔槔大路交衢悉施焉或謂之表木以

表王者納諫也亦以表識衢路也

帝王世紀堯置敢諫之鼓淮南子堯置

敢諫之鼓舜立誹謗之木

尸子堯立誹謗木

呂氏

春秋堯有欲諫之鼓

晉張紘云堯舜立敢諫之鼓

三

王立誹謗之木

文選注云進善之旌堯立之五達之道

誹謗木堯作之橋梁板所以書政治之愆失

淮南子

堯戒曰戰戰慄慄日慎一

日人莫蹟于山而蹟于涇

呂氏春秋堯戰于丹水之浦以服南蠻

帝王世紀諸侯有苗氏處南蠻

而不服堯征而克

之於丹水之浦

淮南子堯之時十日竝出焦禾稼殺草木而民無所食

獬豸鑿齒九嬰大風封豨修蛇皆為民害堯乃使羿誅

鑿齒於壽華之野殺九嬰於凶水之上繳大風於青丘

之澤上射十日而下殺契踰斷修蛇於洞庭擒封豨於

桑林萬民皆喜置堯以為天子於是天下廣狹險易遠

近始有道里

山海經羿與鑿齒戰于壽華之野羿射殺之羿持弓矢鑿齒持盾一曰戈 冥窳龍

首居弱水中其狀如龍首食人

貳負之臣曰危危與

貳負殺冥窳帝桎之疏屬之山桎其右足反縛兩手與

髮繫之山上木

帝俊賜羿彤弓素矰以扶下國羿是

始去恤下地之百艱

楚辭注堯令羿仰射十日中其

九日日中九鳥皆死墮

其羽翼。諸說荒誕

呂氏春秋帝堯立乃命質為樂質乃效山林谿谷之音
以歌乃以麋鞞置缶而鼓之乃拊石擊石以象上帝玉

磬之音以致舞百獸瞽叟乃拌五絃之瑟作以為十五

絃之瑟命之曰大章以祭上帝

帝王世紀夔放山川谿谷之音作樂大章天下

大和

古今樂錄神人賜帝堯所作堯郊天地祭神座上

有響誨堯曰水方至為害命子救之堯乃作歌曰清

廟歟兮承予宗百寮肅兮于寢堂醑禱進福求年豐有

韻在坐敕予為害在玄中欽哉昊天德不隆承命任禹

寫中

宮

新書帝堯曰吾存心於先古加意於窮民痛萬姓之罹

罪憂衆生之不遂也故一民或饑曰此我饑之也一民

或寒曰此我寒之也一民有罪曰此我陷之也仁行而

義立德博而化富故不賞而民勸不罰而民治先恕而後行是以德音遠也是故堯教化及雕題蜀越撫交趾身涉流沙地封獨山西見王母訓及大夏渠搜北中幽都及狗國與人身鳥面及焦僥好賢而隱不還而彊於行而菑於志率以仁而恕至此而已矣

管子昔者堯之治天下也猶埴之在埏也唯陶之所以為猶金之在鑪恣治之所以鑄其民引之而來推之而往使之而成禁之而止故堯之治也善明法禁之令而

已矣 倂堯之時混吾之美在下其道非獨出人也山
不童而用贍澤不弊而養足耕以自養以其餘應良天
子故平牛馬之牧不相及人民之俗相知不出百里
而來足故卿而不理靜也其獄一跼腓一跼履而當死
堯舜之王所以化海內者北用禹氏之玉南貴江漢
之珠其勝禽獸之仇以大夫隨之令諸侯之子將委質
者皆以雙武之皮卿大夫豹飾列大夫豹幘大夫散其
邑粟與其財物以市虎豹之皮故山林之人刺其猛獸

若從親戚之仇此君冕服於朝而猛獸勝於外大夫已散其財物萬人得受其流此堯舜之數也

列子堯治天下五十年不知天下治歟不治歟不知億兆之願戴已歟不願戴已歟顧問左右左右不知問外朝外朝不知問在野在野不知堯乃微服游於康衢聞童兒謠曰立我蒸民莫匪爾極不識不知順帝之則堯喜問曰誰教爾為此言童兒曰我聞之大夫問大夫大夫曰古詩也堯還宮召舜因禪以天下舜不辭而受之

○堯七十
載始舉舜

高士傳帝堯之世天下太和百姓無事壤父年八十餘而擊壤於道中觀者曰大哉帝之德也壤父曰吾日出而作日入而息鑿井而飲耕田而食帝何德於我哉

莊子堯觀乎華華封人曰嘻聖人請祝聖人使聖人壽堯曰辭使聖人富堯曰辭使聖人多男子堯曰辭封人曰壽富多男子人之所欲也汝獨不欲何邪堯曰多男子則多懼富則多事壽則多辱是三者非所以養德也

故辭封人曰始也我以汝為聖人邪今然君子也天生萬民必授之職多男子而授之職則何懼之有富而使
人分之則何事之有夫聖人鶉居而穀食鳥行而無彰
天下有道則與物皆昌天下無道則脩德就閒千歲厭
世去而上僊乘彼白雲至於帝鄉三患莫至身常無殃
則何辱之有封人去之堯隨之曰請問封人曰退已
述異記陶唐之世越裳國獻千歲神龜方三尺餘背上
有文科斗書記開闢以來帝命錄之謂之龜厯堯為

仁君一日十瑞宮中芻化為禾鳳凰止於庭神龍見於
宮治厯草生堦宮禽五色鳥化白神木生蓮蓬蒲生厨
景星耀於天甘露降於地是為十瑞

尚書中候堯即政七十載德政清平比隆伏羲鳳皇巢
於阿閣驪林景星出翼軫朱草生郊嘉禾滋連甘露潤

液醴泉出山

宋符瑞志帝在位七十年景星出翼鳳凰
在庭朱草生嘉禾秀甘露潤醴泉出日月

如合璧五
星如連珠

說文萐莆瑞草也堯時生於庖厨扇暑而涼

宋符瑞志
厨中自生

肉其薄如簾搖動則風生
食物寒而不臭名曰簾脯

田俅子堯為天子蓂莢生於庭為帝成歷

宋符瑞志又有草夾階而

生月朔始生一莢月半而生十五莢十六日以後日落一莢及晦而盡月小則一莢焦而不落名曰蓂莢一曰

歷堯時有獬豸緝其毛為帝帳

博物志堯時有屈佚草生於庭佞人入朝則屈而指之

一名指佞草

拾遺記堯在位七十年有鸞鵠藏歲來集麒麟遊於藪澤泉鳴逃於絕漠有祗支之

國獻重明之鳥一名雙睛言雙睛在目狀如雞鳴似鳳時解落毛羽肉翮而飛能搏逐猛獸虎狼使妖災羣惡不能為害飴以瓊膏或一歲數來或數歲不至國人莫不埽灑門戶以望重明之集其未至之時國人或刻木

鑄金為此鳥之狀置於門戶之間則魑魅醜類自然退
伏員嶠山有木名猗桑黃樁以為蜜有冰蠶長七寸
黑色有角有鱗以霜雪覆之然後作蜃長一尺其色五
彩織為文錦入水不濡以之投火經宿不燎唐堯之世
海人獻之堯以為黼黻帝堯在位聖德光洽河洛之
濱得玉版方尺圖天地之形又獲金壁之瑞文字炳列
記天地造化之始四凶既除善人來服分職設官彝倫
攸敘乃命大禹疏川豬澤有吳之鄉有北之地無有妖
災沈翔之類自相馴擾幽州之墟羽山之北有善鳴之
禽人面鳥喙八翼一足毛色如雉行不踐地名曰青鸛
其聲似鐘磬笙竽也世語曰青鸛鳴時太平故盛明之
世翔鳴藪澤音中律呂飛而不行至禹平水土棲於川
岳所集之地必有聖人出焉自古鑄
諸鼎器皆圖象其形銘贊至今不絕

說苑當堯之時舜為司徒契為司馬禹為司空后稷為

田疇變為樂正倕為工師伯夷為秩宗皋陶為大理益掌毆禽堯體力便巧不能為一焉堯為君而九子為臣其何故也堯知九職之事使九子者各受其事皆勝其任以成九功堯遂成厥功以王天下是故知人者王道也知事者臣道也王道知人臣道知事毋亂舊法而天

下治矣

韓詩外傳辟土殖穀者后稷也決江疏河者禹也聽獄執中者皋陶也然而有聖名者堯也

尚書刑德考益為司馬禹為司徒禹為司空三公象三能矣春秋元命苞堯為天子季秋下旬夢白虎遺馬喙子其母曰扶始升高丘觀白虎上有雲感已生皋陶索扶始問之如堯言明於刑法罪次始終故立皋陶為

大理 白虎通皋陶烏喙是謂至信決獄明白察於人情
文子皋陶喑而為大理天下無虐刑有貴乎言者也
荀子皋陶之狀色如削爪 淮南子伯益作井而
龍登玄雲神棲崑崙能愈多而德愈薄矣 世本伯夷
作刑垂作鐘
無句作磬

淮南子堯之治天下也舜為司徒契為司馬禹為司空
后稷為大田師奚仲為工其導萬民也水處者漁山處
者木谷處者牧陸處者農地宜其事事宜其械械宜其
用用宜其人澤皋織網陵阪耕田得以所有易所無以
所工易所拙是故離叛者寡而聽從者衆譬若播棊丸

於地員者走澤方者處高各從其所安夫有何上下焉
若風之遇蕭忽然感之各以清濁應矣

○文
子同

新語民知室居食穀而未知功力於是后稷乃列封疆
畫畔界以分土地之所宜闢土殖穀以用養民種桑麻
致絲枲以蔽形體當斯之時四瀆未通洪水為害禹乃
決江疏河通之四瀆致之於海大小相引高下相受百
川順流各歸其所然後人民得去高險處平土川谷交
錯風化未通九州絕隔未有舟車之用以濟深致遠於

是奚仲乃橈曲為輪因直為轅駕馬服牛浮舟杖楫以
代人力鑠金鏤木分苞燒殖以備器械於是民知輕重
好利惡難避勞就逸於是皋陶乃立獄制罪懸賞設罰
異是非明好惡檢奸邪消佚亂

呂氏春秋堯不以帝見善綖北面而問焉堯天子也善
綖布衣也何故禮之若此其甚也善綖得道之士也得
道之人不可驕也堯論其德行達智而弗若故北面而

問焉

漢書小說家務成子十一篇稱堯問非古語
帝王世紀堯乃以尹壽許由為師

莊子堯讓天下於許由曰日月出矣而燭火不息其於
光也不亦難乎時雨降矣而猶浸灌其於澤也不亦勞
乎夫子立而天下治而我猶尸之吾自視缺然請致天
下許由曰子治天下天下既已治也而我猶代子吾將
為名乎名者實之賓也吾將為賓乎鷦鷯巢於深林不
過一枝偃鼠飲河不過滿腹歸休乎君子無所用天下
為庖人雖不治庖尸祝不越樽俎而代之矣

呂氏春秋
昔者堯朝

許由於沛澤之中曰十日出而焦火不息不亦勞乎夫
子為天子而天下已治矣請屬天下於夫子許由辭曰

為天下之不治與而既已治矣自為與啁噍巢於林不
過一枝偃鼠飲於河不過滿腹歸已君乎惡用天下遂
之箕山之下潁水之陽耕而食終身無經天下之色
符子許由欲觀帝意謂堯曰坐於華殿之上而兩闕之
下君之榮願亦已足矣夫堯曰余坐華殿之上森然而
松生於棟余立樞扉之內霏然而雲生於牖雖面兩闕
無異乎雀觀之冠蓬萊雖背墉郭無異乎迴巒之縈崑
崙余安知其所以安榮韓非子堯以天下讓許由許
由逃之舍於家人家人藏其皮冠夫棄天下而家人藏
其皮冠是不知許由者也莊子堯之師曰許由許由
之師曰齧缺齧缺之師曰王倪王倪之師曰被衣堯問
於許由曰齧缺可以配天乎吾藉王倪以要之許由曰
殆哉圾乎天下齧缺之為人聰明睿智給數以敏其
性過人而又乃以人受天彼審乎禁過而不知過之所
由生與之配天乎彼且乘人而無天方且本身而異形
方且尊知而火馳方且為緒使方且為物絃方且四顧

而物應方且應衆宜方且與物化而未始有恒夫何足以配天乎雖然有族有祖可以為衆父而不可以為衆父父治亂之率也北面之禍也南面之賊也意而子見許由許由曰堯何以資汝意而子曰堯謂我汝必躬服仁義而明言是非許由曰爾奚來為軹夫堯既已黜汝以仁義而劓汝以是非矣汝將何以遊夫遙蕩恣睢轉徙之塗乎意而子曰雖然吾願遊於其藩許由曰不然夫盲者無以與乎眉目顏色之好瞽者無以與乎青黃黼黻之觀意而子曰夫無莊之失其美據梁之失其力黃帝之亡其知皆在鑪錘之間耳庸詎知夫造物者之不息我黜而補我劓使我乘成以隨先生邪許由曰噫未可知也我為汝言其大略吾師乎吾師乎螯萬物而不為義澤及萬世而不為仁長於上古而不為老覆載天地刻彫衆形而不為巧此所遊已 齧缺問乎王倪曰子知物之所同是乎曰吾惡乎知之子知子之所不知邪曰吾惡乎知之然則物無知邪曰吾惡乎知之

雖然嘗試言之庸詎知吾所謂知之非不知邪庸詎知吾所謂不知之非知邪且吾嘗試問乎汝民淫寢則腰疾偏死齟然乎哉木處則惴惴恂懼猴然乎哉三者孰知正處民食芻豢麋鹿食薦蜩且甘帶鴟鴞耆鼠四者孰知正味猿獼狢以為雌麋與鹿交齟與魚游毛嫱麗姬人之所美也魚見之深入鳥見之高飛麋鹿見之決驟四者孰知天下之正色哉自我觀之仁義之端是非之塗樊然殽亂吾惡能知其辯齧缺曰子不知利害則至人固不知利害乎王倪曰至人神矣大澤焚而不能熱河漢沍而不知寒疾雷破山風振海而不能驚若然者乘雲氣騎日月而遊乎四海之外死生無變於已而況利害之端乎○莊生文奇縱而寓言無稽如此稱毛嫱麗姬之類齧缺問於王倪四問而四不知齧缺因躍而大喜行以告蒲衣子蒲衣子曰而乃今知之乎有虞氏不及泰氏有虞氏其猶藏仁以要人亦得人矣而未始出於非人泰氏其臥徐徐其覺于于一以已為

馬一以已為牛其知情信其德甚真而未始入於非人
至攝汝知一汝度神將來舍德將為汝美道將為汝居
汝瞳焉知新生之犢而無求其故言未卒齧缺睡眠被
衣大說行歌而去之曰形若槁骸心若死灰真其實知
不以故自持媒媒晦晦無心而不可與謀彼何人哉

高士傳許由字武仲陽城槐里人也為人據義履方邪
席不坐邪膳不食後隱於沛澤之中堯讓天下於許由
許由不受而逃去於是遁耕於中岳潁水之陽箕山之
下終身無經天下之色堯又召為九州長由不欲聞之
洗耳於潁水濱時其友巢父牽犢欲飲之見由洗耳問

其故對曰堯欲召我為九州長惡聞其聲是故洗耳巢

父曰子若處高岸深谷人道不通誰能見子子故浮游

欲聞求其名譽汙吾犢口牽犢上流飲之許由沒葬箕

山之巔

水經注箕山上有許由冢堯所封也山下有牽牛墟側潁水有犢泉是巢父牽牛處也石上犢

跡存焉

古今樂錄許由者古之貞固之士也以清節

約聞於堯堯乃遣使禪為天子由喟然嘆曰匹夫結志

固如磐石採山飲河所以養性非以貪天下也堯既殂

落乃作箕山之歌曰登彼箕山兮瞻望天下山川麗崎

萬物還普日月運照靡不記睹游放其間何所却慮歎

彼唐堯獨自愁苦勞心九州憂勤后土謂予欽明傳禪

易祖我樂何如蓋不盼顧河水流兮緣高山甘瓜施兮

葉綿蠻高林肅兮相錯連居此之處傲堯君古史考

許由隱箕山恬泊養性無欲於世堯禮待之終不肯就
時人遂崇大之曰堯將以天下讓許由由恥聞之乃洗
其耳又有巢父與許由同志或曰許由夏常居巢故一
號巢父 法言或問堯將讓天下於許由由恥有諸曰
好大者為之也顧由無求於世而已矣允哲堯檀舜之
重則不輕於由矣好大累克巢父灑耳不亦宜乎○堯
讓由辭其入其事俱在有無之間譙周以為有其人無
其事本揚子也 莊子堯以天下讓許由許由不受又
讓於子州支父子州支父曰以我為天子猶之可也雖
然我適有幽憂之病方且治之未暇治天下也夫天下
至重也而不以害其生又況他物乎唯無以天下為者
可以託天下也 符子堯以天下讓巢父巢父曰君之
牧天下亦猶余之牧孤犢是各有其所牧矣君馬用喘
喘馬以所牧而與余余無用天下為也於是牽犢而去
○莊子不言巢父則巢父又後人增設 列仙傳偃佺
者槐山採藥父也形體生毛兩目更方能飛行逐走馬

以松子遺堯堯不暇服也時人受服者皆至二三百歲焉方回者堯時隱人也堯聘以為閭士鍊食雲母隱於五柞山中夏啓末為宦士為人所劫閉之室中從求道回化而得去更以方回印封其戶時人言得回一九泥塗門戶終不可開

大戴禮記帝堯娶散宜氏之子謂之女皇氏

帝王世紀堯娶散宜

氏之女曰女皇生丹朱又有庶子九人皆不肖博物志堯作圍棋以教丹朱

帝王世紀堯以甲申歲生甲辰即帝位甲午徵舜甲寅舜代行天子事辛巳崩年百十八在位九十八年葬於濟陰之城陽西北是為穀林

墨子堯北教乎八狄道死葬顰山之陰衣衾三領穀木之棺葛以緘之既訖而後哭滿埴無封已葬而牛馬乘之

呂氏春秋堯葬于穀林通樹之

皇覽堯冢在濟陰城陽山海經狄山帝堯葬

於陽帝嘗葬於陰爰有熊羆文虎雉豹離朱視肉吁咽文王皆葬其所一曰湯山一曰爰有熊羆文虎雉豹離朱鵠久視肉庠交帝堯帝嘗帝舜葬於岳山爰有文貝離瑜鵠久賔賈延維視肉熊羆虎豹朱木赤支青華

實玄

書曰欽若昊天厯象日月星辰敬授人時此堯之初

政也。歷數之起尚矣。庖犧氏畫八卦以應氣候。炎帝分八節以紀農功。黃帝迎日推策造律。呂作甲子定閏餘。少昊命烏師以司分至。啓閉顓頊建孟春。以為歷元。及堯即位。懼前法之未備。歲久之差移也。始為歷象之法。察日星均四時。順民情。驗物理。而疇人分職之事。必諄切告誡之。可謂至慎至詳矣。且帝之所以首重其事者。何也。人君代天理民。非敬天無以圖治。非憲天無以出治。非奉天無以成治。帝惟以兢業

欽若之心懷乎居兆民之上以天道為君道是以百
工允釐庶績咸熙行之五十餘年休祥竝臻童叟歌
謠治之極也極治之後會有一亂顧帝以欽明之德
致時雍之化亂胡由生天降洪水下民昏墊胥子不
肖鯀績無成凡此者皆天也而在朝舊臣不過共驩
之等夷帝是以憂惶咨詢務得可以巽位之聖人然
後明揚師錫舉舜而薦之天焉凡此者亦皆天也而
說者曰四凶在朝堯不能去元愷在野堯不能用此

非堯之不能也當舜未登庸之時共驩諸臣類有鳩
功任事之才凶蹟未著聖人何為無罪而行誅抑帝
所汲汲咨求者得舜而授之以政既得舜矣考績黜
陟之典悉以委之所去所舉猶是以帝堯之心為心
而堯何庸有事哉惟時禹皋稷契咸奏碩功元愷之
流因才授職罪人斯得野無遺賢於是舜之德莫非
堯之德羣下之功莫非堯之功矣今之言至治者必
推唐虞之際而不知堯舜之時乃能轉亂以為治又

能因亂以成治也二十八載之後堯之與天下宜若
相忘矣一旦殂落百姓如喪考妣則堯之於百姓與
舜之所以事堯者不概見哉是以吾夫子上下千載
刪書斷自帝堯始而贊之曰惟天為大惟堯則之巍
巍乎其成功煥乎其有文章帝德廣運乃聖乃神乃
武乃文言則天也合和萬國命官分職地平天成烝
民乃粒言成功也制作明備禮樂具舉聲教四達萬
世作則言文章也用以德越前聖道開百王其稱大

也宜哉或曰堯讓天下於許由許由不受使堯無憂
天下之心以徒讓為事而後可善乎太史公之言曰
堯之於舜岳牧咸薦乃試之以位典職數十年傳天
下若斯之難也讓由云乎哉

繹史卷九

欽定四庫全書

釋史卷十

靈壁縣知縣馬驕撰

有虞紀

史記虞舜者名曰重華重華父曰瞽叟瞽叟父曰橋牛
橋牛父曰句望句望父曰敬康敬康父曰窮蟬窮蟬父

曰帝顓頊帝顓頊父曰昌意以至舜七世矣自從窮蟬

以至帝舜皆微為庶人

○大戴禮橋作螭望作芒呂梁碑云舜祖幕幕生窮蟬窮蟬生

敬康敬康生喬牛喬牛生瞽叟瞽叟生舜中無句望一世

帝王世紀帝舜有虞氏姚姓也目重瞳故名重華字都

君有聖德

宋書符瑞志母曰握登見大虹意感而生舜於姚墟目重瞳子故名重華龍顏大口黑色

身長六尺一寸

真源賦舜字仲華

孝經援神契舜

龍顏重瞳大口手握寶

洛書靈淮聽有人方面日衡

重華握石椎懷神珠

白虎通舜重瞳子是謂玄景上

應攝提以象三光○元命苞玄景作滋涼

淮南子舜

二瞳子是謂重明作事成法出言成章

春秋繁露舜

形體大上而圓首長於天文純於孝慈

荀子堯舜參

子牟

史記舜父瞽叟盲而舜母死瞽叟更娶妻而生象象傲

瞽叟愛後妻子常欲殺舜舜避逃及有小過則受罪順

事父及後母與弟日以篤謹匪有懈 舜父瞽叟頑母
嚚弟象傲皆欲殺舜舜順適不失子道兄弟孝慈欲殺
不可得即求嘗在側舜年二十以孝聞

越絕書舜親父假母母常殺舜去耕歷山三年大熟身
自外養父母皆饑舜父頑母嚚兄狂弟傲舜求為變心

易志瞽瞍欲殺舜未嘗可得呼而使之未嘗不在側

帝王

世紀舜能和諧大杖則避小杖則受年二十始以孝聞
抱朴子有虞至孝三足鳥集其庭 琴操舜耕於歷

山思慕父母見鳩與母俱飛
鳴相哺食益以感恩乃作歌

史記舜冀州之人也舜耕歷山漁雷澤陶河濱作什器

於壽丘就時於負夏

搜神記虞舜耕於歷山得玉厯於河濟之巖舜知天命在己體道不

倦尚書大傳舜耕於歷山夢眉與髮等

尸子虞舜灰

於常羊什器於壽丘就時於負夏未嘗暫息頓丘買貴

於是販於頓丘傳虛賣賤於是債於傳虛以均救之

墨子舜耕於歷山陶於河濱漁於雷澤灰於常陽堯得

之服澤之陽立為天子公孫尼子舜牧牛於潢陽堯

舉之以為天子尸子舜事親養兄為天下法其游也

得六人曰雄陶方回續牙伯陽東不識秦不空皆一國

之賢者也○或作東不訾秦不虛又有靈甫曰七人

魯連子舜耕於歷山而

友益陶於河濱而友禹舜耕歷山歷山之人皆讓畔

漁雷澤雷澤上人皆讓居陶河濱河濱器皆不苦窳一

年而所居成聚二年成邑三年成都

呂氏春秋舜耕於歷山陶於河濱釣

於雷澤天下說之秀士從之帝王世紀舜始遷於負夏販於頻丘債於傳虛家本冀州每徙則百姓歸之

淮南子昔舜耕於歷山耨年而田者爭處境墉以封壤

肥饒相讓釣於河濱耨年而漁者爭處湍瀨以曲隈深

潭相予當此之時口不設言手不指麾執玄德於心而

化馳若神使舜無其志雖口辨而戶說之不能化一人

韓非子歷山之農者侵畔舜往耕焉耨年畊畝正河濱之漁者爭坻舜往漁焉耨年而讓長東夷之陶者器苦窳舜往陶焉耨年而器牢仲尼歎曰耕漁與陶非舜官也而舜往為之者所以救敗也舜其信仁乎乃躬耕處

苦而民從之故曰聖人之德化乎或問儒者曰方此時也堯安在其人曰堯為天子然則仲尼之聖堯奈何聖人明察在上位將使天下無姦也今耕漁不爭陶器不窳舜又何德而化舜之救敗也則是堯有失也賢舜則去堯之明察聖堯則去舜之德化不可兩得也楚人有鬻楯與矛者譽之曰吾楯之堅莫能陷也又譽其矛曰吾矛之利於物無不陷也或曰以子之矛陷子之楯何如其人弗能應也夫不可陷之楯與無不陷之矛不可同世而立今堯舜之不可兩譽矛楯之說也且舜救敗暮年已一過三年已三過舜有盡壽有盡天下過無已者以有盡逐無已所止者寡矣賞罰使天下必行之令曰中程者賞弗中程者誅令朝至暮變暮至朝變十日而海內畢矣奚待暮年舜猶不以此說堯令從己乃躬親不亦無術乎且夫以身為苦而後化民者堯舜之所難也處勢而令下者庸主之所易也將治天下釋庸主之所易道堯舜之所難未可與為政也○矛楯之喻辨

矣利口奪正是故惡夫佞者尸子舜廉愛百姓務利天下其田歷山也荷彼耒耜耕彼南畝與四海俱有其利其漁雷澤也旱則為耕者鑿瀆儉則為獵者表虎故有光若日月天下歸之若父母文心雕龍舜之祠田云荷此長耜耕彼南畝四海俱有利民之志頗形於言矣

越絕書舜用其仇而王天下者言舜父瞽瞍用其後妻常欲殺舜舜不為失孝行天下稱之堯聞其賢遂以天

下傳之此為王天下仇者舜後母也

劉向孝子傳舜父夜臥夢見一鳳凰

自名為雞口銜米以食己言雞為子孫視之乃鳳凰以黃帝夢書占之此子孫當有貴者舜占猶之比年糴糈穀中有錢舜也乃三日夜仰天自告舜過前舐之目霍然開真源賦舜糴於平陽中父認之乃舐其目

明以光

書帝曰疇咨若時登庸放齊曰胤子朱啓明帝曰吁嚚訟可乎帝曰疇咨若予采驩兜曰都共工方鳩僝功帝曰吁靜言庸違象恭滔天帝曰咨四岳朕在位七十載汝能庸命巽朕位岳曰否德忝帝位曰明明揚側陋師錫帝曰有鰥在下曰虞舜帝曰俞予聞如何岳曰瞽子父頑母嚚象傲克諧以孝烝烝乂不格姦帝曰我其試哉女於時觀厥刑于二女釐降二女于媯汭嬪于虞

帝曰欽哉

書序在昔帝堯聰明文思光宅天下將遜于位讓于虞舜作堯典

尸子舜一徙成邑再徙成都三徙成國堯聞其賢徵之
草茅之中與之語禮樂而不逆與之語政至簡而行與
之語道廣大而不窮於是妻之以嬪媵之以娥九子事
之而託天下焉

新論堯之知
舜不違桑陰

史記三十而帝堯問可用者四嶽咸薦虞舜曰可於是
堯乃以二女妻舜以觀其內使九男與處以觀其外舜
居媯汭內行彌謹堯二女不敢以貴驕事舜親戚甚有

婦道堯九男皆益篤

大戴禮記帝舜娶於帝堯之子謂之女匡氏列女傳有虞二妃帝

堯二女也長娥皇次女英二女承事舜於畎畝之中不以天子之女故而驕盈怠嫚猶謙謙恭儉思盡婦道

尸子有虞氏身有南畝妻有桑田淮南子堯妻以二女以觀其內任以百官以觀其外乃屬以九子贈以昭

華之玉呂氏春秋堯傳天下於舜禮之諸侯妻以二女臣以十子身請北面朝之○諸子雜記多妄

堯乃賜舜絺衣與琴為築倉廩予牛羊瞽叟尚復欲殺

之使舜上塗廩瞽叟從下縱火焚廩舜乃以兩笠自扞

而下去得不死後瞽叟又使舜穿井舜穿井為匿空旁

出舜既入深瞽叟與象共下土實井舜從匿空出去

列女

傳替叟與象謀殺舜使塗廩二女曰往哉舜既治廩乃捐階替叟焚廩舜往飛去象復與父母謀使舜浚井二女曰往哉舜往浚井格其出入從掩舜潛出時既不能殺舜替叟又速舜飲酒醉將殺之二女乃與舜藥浴注遂往舜終日飲酒不醉舜之女弟繫憐之與二嫂諧通史替叟使舜滌廩舜告堯二女女曰時其焚汝鵲汝衣裳鳥工往舜既登廩得免去舜穿井又告二女女曰去汝裳衣龍工往入井替叟與象下土實井舜從他井出去 宋符瑞志舜父母憎舜使其塗廩自下焚之舜服鳥工衣服飛去又使浚井自上填之以石舜服龍工衣自傍而出 論衡舜未逢堯鰥在側陋替叟與象謀殺之使之完廩火燔其下令之浚井上掩其上舜得下廩不被火災穿井旁出不觸土害堯聞徵用○蘇子古史云四岳之薦舜曰烝烝人不格姦豈有既已用之而猶欲殺之哉前編謂孟子發明聖人處變之心則其事迹之前後有無皆不必辨按論衡以焚廩掩井事在舜

未逢堯時
蓋近之矣

瞽叟象喜以舜為己死象曰本謀者象象

與其父母分於是曰舜妻堯二女與琴象取之牛羊倉

廩予父母象乃止舜宮居鼓其琴舜往見之象鄂不懌

曰我思舜正鬱陶舜曰然爾其庶矣舜復事瞽叟愛弟

彌謹

○萬章稱舜在牀琴史復謂象
居舜宮鼓其琴詭之中又詭矣

書曰若稽古帝舜曰重華協于帝濬哲文明溫恭允塞

玄德升聞乃命以位

○今文無此二十八
字合上堯典為一篇

慎徽五典

五典克從納于百揆百揆時叙賓于四門四門穆穆納

于大麓烈風雷雨弗迷

史記於是堯乃試舜五典百官皆治昔高陽氏有才子
八人世得其利謂之八愷高辛氏有才子八人世謂之
八元此十六族者世濟其美不隕其名至於堯堯未能
舉舜舉八愷使主后土以揆百事莫不時叙舉八元使
布五教于四方父義母慈兄友弟恭子孝內平外成昔
帝鴻氏有不才子掩義隱賊好行凶慝天下謂之渾沌
少皞氏有不才子毀信惡忠崇飾惡言天下謂之窮奇

顓頊氏有不才子不可教訓不知話言天下謂之檮杌
此三族世憂之至于堯堯未能去緡雲氏有不才子貪
於飲食冒于貨賄天下謂之饕餮天下惡之比之三凶

舜賓于四門乃流四凶族遷于四裔以御魑魅于是四

門辟言毋凶人也

○杜元凱云八愷即垂益禹皋陶之倫八元即稷契朱虎熊羆之倫渾敦

謂驩兜窮奇謂共工檮杌謂鯀正義亦云饕餮謂三苗也然則四凶之誅不盡在舜受終於文祖之後矣

堯使舜入山林川澤暴風雷雨舜行不迷堯以為聖

論衡

試之於職官治職修事無廢亂使入大麓之野虎狼不搏螭蛇不噬逢烈風疾雨行不迷惑列女傳既納於

百揆賓於四門選於林木入于大麓堯試之百方每事常謀於二女

堯乃知舜之足授

天下堯老使舜攝行天子政巡狩

書帝曰格汝舜詢事考言乃言底可績三載汝陟帝位

舜讓於德弗嗣正月上日受終於文祖

書序舜在側微堯聞之聰明將

使嗣位歷試諸難作舜典

史記正月上日舜受終於文祖文祖者堯大祖也於是

帝堯老命舜攝行天子之政以觀天命

○正義引竹書云昔堯德哀為

舜所囚又云舜復偃塞丹朱使不與父相見皆好事者為之

書在璿璣玉衡以齊七政肆類于上帝禋於六宗望于山川徧于羣神輯五瑞既月乃日覲四岳羣牧班瑞于羣后歲二月東巡守至于岱宗柴望秩于山川肆覲東后五玉三帛二生一死贊協時月正日同律度量衡修五禮如五器卒乃復五月南巡守至于南岳如岱禮八月西巡守至于西岳如初十有一月朔巡守至于北岳如西禮歸格于藝祖用特五載一巡守羣后四朝敷奏以言明試以功車服以庸

文中子舜一歲而巡四岳兵衛少而徵求寡也尚書璣

璣鈴帝堯炳煥隆興可觀曰載曰車曰軒曰冠曰冕作此車服以賜有功

象以典刑流宥

五刑鞭作官刑扑作教刑金作贖刑眚災肆赦怙終賊

刑欽哉欽哉惟刑之恤哉 流共工于幽州放驩兜于

崇山竄三苗于三危殛鯀于羽山四罪而天下咸服○

書

記四罪於攝位之末前編云作書者紀舜二十八年之間所刑者四人而已若果季年之事禹已成功而猶罪鯀人情之必不然者

史記驩兜進言共工堯曰不可而試之工師共工果淫辟四嶽舉鯀治鴻水堯以為不可嶽彊請試之試之而

無功故百姓不便三苗在江淮荊州數為亂於是舜歸
言於帝請流共工於幽陵以變北狄放驩兜於崇山以
變南蠻遷三苗於三危以變西戎殛鯀於羽山以變東

夷四臯而天下咸服

○雜書稱鯀共工作亂附載於後
韓非子堯欲傳天下於舜鯀諫

曰不祥哉孰以天下而傳之於匹夫乎堯不聽舉兵而
誅殺鯀於羽山之郊共工又諫曰孰以天下而傳之於
匹夫乎堯不聽又舉兵而誅共工於幽州之都於是天
下莫敢言無傳天下於舜仲尼聞之曰堯之知舜之賢
非其難者也夫至乎誅諫者必傳之舜乃其難也一日
不以其所疑敗其所察則難也呂氏春秋堯以天下
讓舜鯀為諸侯怒於堯曰得天之道者為帝得地之道
者為三公今我得地之道而不以我為三公以堯為失

論欲得三公怒甚猛獸欲以為亂凡獸之角能以為城
舉其尾能以為旌召之不來仿佯於野以患帝舜於是
殛之於羽山副之以吳刀禹不敢怒而反事之官為司
空以通水潦顏色黎黑步不相過竅氣不通以中帝心
世本鯀作城博物志昔唐堯以天下讓於虞三
苗之民非之帝殺有苗之民叛浮入南海為三苗國

荀子堯問於舜曰我欲致天下為之奈何對曰執一無
失行微無怠忠信無倦而天下自來執一如天地行微
如日月忠誠盛於內賁於外形於四海天下其在一隅
邪夫有何足致也 堯問於舜曰人情何如舜對曰人
情甚不美又何問焉妻子具而孝衰於親嗜欲得而信

哀於友爵祿盈而忠哀於君人之情乎人之情乎甚不
美又何問焉

尸子堯問於舜曰何事曰事天何任曰任地何務曰務
人

莊子昔者舜問於堯曰天王之用心何如堯曰吾不教
無告不廢窮民苦死者嘉孺子而哀婦人此吾所以用
心已舜曰美則美矣而未大也堯曰然則何如舜曰天
德而出寧日月照而四時行若晝夜之有經雲行而雨

施矣堯曰然則膠膠擾擾乎子天之合也我人之合也
昔者堯問於舜曰我欲伐宗膾胥敖南面而不釋然
其故何也舜曰夫三子者猶存乎蓬艾之間若不釋然
何哉昔者十日竝出萬物皆照而況德之進乎日者乎

○諸子記堯舜問答之言未足據信 呂氏春秋客有
問季子曰奚以知舜之能也季子曰堯固已治天下矣
舜言治天下而合己之符是以知其能也若雖知之奚
道知其不為私季子曰諸能治天下者固必通乎性命
之情者當無私矣夏不衣裘非愛裘也煖有餘也冬不
用翼非愛翼也清有餘也聖人之不為私也非愛貴也
節乎己也節己雖貪汙之心猶若止又況乎聖人
金樓子舜攝天子有援耳貫胃之民來獻珠蝦

史記堯知子丹朱之不肖不足授天下於是乃權授舜
授舜則天下得其利而丹朱病授丹朱則天下病而丹
朱得其利堯曰終不以天下之病而利一人而卒授舜

以天下

宋符瑞志堯歸功於舜將以天下禪之乃潔齋修壇場於河雒擇良日率舜等升首山遵河渚

有五老遊焉蓋五星之精也相謂曰河圖將來告帝以期知我者重瞳黃姚五老因飛為流星上入昴二月辛丑昧明禮備至於日昃榮光出河休氣四塞白雲起回風搖乃有龍馬銜甲赤文綠色臨壇而止吐甲圖而去甲似龜背廣九尺其圖以白玉為檢赤玉為泥以黃金約以青繩檢文曰閭色授帝舜言虞夏殷周秦漢當受天命帝乃寫其言藏於東序後二年二月仲辛率羣臣沈璧於洛禮畢退俟至於下昃赤光起玄龜負書而出

背甲赤文成字止於壇其書言當禪舜遂讓舜 論語
比考識仲尼曰帝堯率舜等游於首山觀河渚有五老
游河渚一曰河圖將來告帝期二曰河圖將來告帝謀
三曰河圖將來告帝符有頃赤龍銜玉苞舒圖刻板題命可卷
圖將來告帝封盛書戒曰知我者重瞳也五老乃為流星
金泥玉檢封盛書戒曰知我者重瞳也五老乃為流星
上入昴黃姚視之龍沒圖在堯等共發曰帝當樞百則
禪於虞 春秋元命苞堯游河渚赤龍負圖以出圖出
如綈狀龍沒圖在 春秋合誠圖堯坐舟中與太尉舜
臨觀鳳皇負圖授堯其章曰天賜帝符璽五字 春秋
運斗樞赤龍負圖以出河見堯與太尉舜等百三十人
集發藏大麓 尚書中候堯率羣臣東沈璧於洛退俟
至於下稷赤光起玄龜負書出赤文成字止壇又沈璧
於河黑龜出赤文題 修壇河洛仲月辛日昧明禮脩
榮光出河休氣四塞龍馬銜甲赤文綠色臨壇上甲似
龜背廣袤九尺圓理平上五色文有列星之分斗政之

度帝王紀錄興亡之數○緯
識雜說河洛之事復穢厭觀

琴清英舜彈五絃之琴而天下治堯加二絃以合君臣

之恩也

○禮記疏曰南風孝子
之詩舜以教天下之孝

尸子帝舜彈五絃之琴以歌南風其詩曰南風之薰兮
可以解吾民之愠兮南風之時兮可以阜吾民之財兮

琴操舜作南風操曰反彼三山兮商岳嵯峨天降五老
兮迎我來歌有黃龍兮自出於河負圖書兮委蛇羅沙
案圖觀識兮閔天嗟嗟擊石拊韶兮淪幽洞微鳥獸踰
踰兮鳳皇來儀凱風自南兮喟其增悲○南風詩亦見
家語雖附託猶存古意
琴操淺鄙斯為下矣

史記堯立七十年得舜二十年而老令舜攝行天子之政薦之於天堯避位凡二十八年而崩百姓悲哀如喪父母三年四方莫舉樂以思堯

書二十有八載帝乃殂落百姓如喪考妣三載四海遏密八音

史記堯崩三年之喪畢舜讓辟丹朱於南河之南諸侯朝覲者不之丹朱而之舜獄訟者不之丹朱而之舜謳歌者不謳歌丹朱而謳歌舜舜曰天也夫然後之中國

踐天子位焉是為帝舜

春秋演孔圖舜將興黃雲升堂

舜之踐帝位

載天子旗往朝父瞽叟夔夔唯謹如子道封弟為諸侯

尚書逸篇堯子丹朱不肖舜使居丹淵為諸侯

尚書逸篇堯子丹朱不肖舜使居丹淵為諸侯

書月正元日舜格于文祖詢于四岳闢四門明四目達

四聰

古今注五明扇舜所作也既受堯禪廣開視聽求賢人以自輔故作五明扇焉

咨十有

二牧曰食哉惟時柔遠能邇惇德允元而難任人蠻夷

率服舜曰咨四岳有能奮庸熙帝之載使宅百揆亮采

惠疇僉曰伯禹作司空帝曰俞咨禹汝平水土惟時懋

哉禹拜稽首讓於稷契暨臯陶帝曰兪汝往哉帝曰棄
黎民阻飢汝后稷播時百穀帝曰契百姓不親五品不
遜汝作司徒敬敷五教在寬帝曰臯陶蠻夷猾夏寇賊
姦宄汝作士五刑有服五服三就五流有宅五宅三居
惟明克允帝曰疇若予工兪曰垂哉帝曰兪咨垂汝共
工垂拜稽首讓於父圻暨伯與帝曰兪往哉汝諧帝曰
疇若予上下草木鳥獸兪曰益哉帝曰兪咨益汝作朕
虞益拜稽首讓於朱虎熊羆帝曰兪往哉汝諧帝曰咨

四岳有能典朕三禮僉曰伯夷帝曰兪咨伯汝作秩宗
夙夜惟寅直哉惟清伯拜稽首讓於夔龍帝曰兪往欽
哉帝曰夔命汝典樂教胄子直而溫寬而栗剛而無虐
簡而無傲詩言志歌永言聲依永律和聲八音克諧無
相奪倫神人以和帝曰龍朕聖讒說殄行震驚朕師命
汝作納言夙夜出納朕命惟允帝曰咨汝二十有二人
欽哉惟時亮天功

漢書書載唐虞之際命羲和四子順天文授民時咨四

岳召舉賢材揚側陋十有二牧柔遠能邇禹作司空平水土棄作后稷播百穀禹作司徒敷五教咎繇作士正五刑垂作共工利器用棻作朕虞育草木鳥獸伯夷作秩宗典三禮夔典樂和神人龍作納言出入帝命

史記舜得舉用事二十年而堯使攝政攝政八年而堯崩三年喪畢讓丹朱天下歸舜而禹臯陶契后稷伯夷夔龍倬益彭祖自堯時而皆舉用未有分職於是舜乃至於文祖謀於四嶽辟四門明通四方耳目命十二牧

論帝德行厚德遠佞人則蠻夷率服此二十二人咸成
厥功臯陶為大理平民各伏得其實伯夷主禮上下咸
讓垂主工師百工致功益主虞山澤辟棄主稷百穀時
茂契主司徒百姓親和龍主賓客遠人至十二牧行而
九州莫敢違違唯禹之功為大披九山通九澤決九河
定九州各以其職來貢不失厥宜方五千里至於荒服
南撫交趾北發西戎析枝渠廋氐羌北山戎發息慎東
長島夷四海之內咸戴帝舜之功 臯陶作士以理民

帝舜朝禹伯夷臯陶相與語帝前臯陶述其謀

○伯夷當作伯

益

書曰若稽古臯陶曰允迪厥德謨明弼諧禹曰兪如何
臯陶曰都慎厥身修思永惇叙九族庶明勵翼邇可遠
在茲禹拜昌言曰兪臯陶曰都在知人在安民禹曰吁
咸若時惟帝其難之知人則哲能官人安民則惠黎民
懷之能哲而惠何憂乎驩兜何遷乎有苗何畏乎巧言
令色孔壬臯陶曰都亦行有九德亦言其人有德乃言

曰載采采禹曰何臯陶曰寬而栗柔而立愿而恭亂而敬擾而毅直而溫簡而廉剛而塞彊而義彰厥有常吉哉日宣三德夙夜浚明有家日嚴祗敬六德亮采有邦翕受敷施九德咸事俊乂在官百僚師師百工惟時撫于五辰庶績其凝無教逸欲有邦兢兢業業一日二日萬幾無曠庶官天工人其代之天叙有典勅我五典五惇哉天秩有禮自我五禮有庸哉同寅協恭和衷哉天命有德五服五章哉天討有罪五刑五用哉政事懋哉

懋哉天聰明自我民聰明天明畏自我民明威達於上
下敬哉有土臯陶曰朕言惠可底行禹曰兪乃言底可
績臯陶曰予未有知思曰贊贊襄哉 帝曰來禹汝亦
昌言禹拜曰都帝予何言予思日孜孜臯陶曰吁如何
禹曰洪水滔天浩浩懷山襄陵下民昏墊予乘四載隨
山刊木暨益奏庶鮮食予決九州距四海濬畎澮距川
暨稷播奏庶艱食鮮食懋遷有無化居烝民乃粒萬邦
作乂臯陶曰兪師汝昌言禹曰都帝慎乃在位帝曰兪

禹曰安汝止惟幾惟康其弼直惟動丕應徯志以昭受
上帝天其申命用休帝曰吁臣哉鄰哉鄰哉臣哉禹曰
兪帝曰臣作朕股肱耳目予欲左右有民汝翼予欲宣
力四方汝為予欲觀古人之象日月星辰山龍華蟲作
會宗彝藻火粉米黼黻絺繡以五采彰施于五色作服
汝明予欲聞六律五聲八音在治忽以出納五言汝聽
予違汝弼汝無面從退有後言欽四鄰庶頑讒說若不
在時侯以明之撻以記之書用識哉欲竝生哉工以納

言時而颺之格則承之庸之否則威之禹曰兪哉帝光
天之下至於海隅蒼生萬邦黎獻共惟帝臣惟帝時舉
敷納以言明庶以功車服以庸誰敢不讓敢不敬應帝
不時敷同日奏罔功無若丹朱傲惟慢遊是好傲虐是
作罔晝夜頌頌罔水行舟朋淫於家用殄厥世予創若
時娶於塗山辛壬癸甲啓呱呱而泣予弗子惟荒度土
功弼成五服至於五千州十有二師外薄四海咸建五
長各迪有功苗頑弗即工帝其念哉帝曰迪朕德時乃

功惟叙臯陶方祗厥叙方施象刑惟明

書序臯陶夫厥謀禹成厥功帝

舜申之作大禹臯陶謨益稷

風俗通咎陶謨禹始造律尚書大傳唐虞象刑犯墨者蒙帛巾犯劓者赭其

衣犯臠者以墨蒙其臠處而畫之犯大辟者布衣無領論衡觴觥者一角之羊也性知有罪臯陶治獄其罪

疑者令羊觸之有罪則觸無罪則不觸故臯陶敬羊起坐視之

尚書大傳維元祀巡狩四岳八伯壇四輿沈四海封十

有二山兆十有二州樂正定樂名元祀代泰山貢兩伯

之樂焉東岳陽伯之樂舞侏離其歌聲比余謠名曰皙

陽儀伯之樂舞襲哉其歌聲比大謠名曰南陽中祀大

交霍山貢兩伯之樂焉夏伯之樂舞謾或其歌聲比中
謠名曰初慮羲伯之樂舞將陽其歌聲比大謠名曰朱
千秋祀柳穀華山貢兩伯之樂焉秋伯之樂舞蔡倅其
歌聲比小謠名曰苓落和伯之樂舞玄鶴其歌聲比中
謠名曰歸來幽都弘山祀貢兩伯之樂焉冬伯之舞齊
落歌曰縵縵并論八音四會歸格於禰祖用特五載一
巡狩羣后德讓貢正聲而九族具成雖禽獸之聲猶悉
關於律樂者人性之所自有也故聖王巡十有二州觀

其風俗習其性情因論十有二俗定以六律五聲八音
七始著其素族以為八此八伯之事也分定於五此五
岳之事也五音天音也八聲天化也七始天統也

史記於是禹乃興九招之樂致異物鳳皇來翔天下明
德皆自虞帝始

呂氏春秋舜立仰延乃拌瞽叟之所為瑟益之八絃以
為二十三絃之瑟帝舜乃令質修九招六列六英以明

帝德

春秋繁露舜時民樂其昭
亮之業也故韶韶者昭也

書夔曰曼擊鳴球搏拊琴瑟以詠祖考來格虞賓在位

羣后德讓下管鼗鼓合止祝敵笙鏞以閒鳥獸蹌蹌簫

韶九成鳳凰來儀夔曰於予擊石拊石百獸率舞庶尹

允諧

宋符瑞志舜即帝位冀莢生於階鳳凰巢於庭擊石拊石百獸率舞景星出房地出乘黃之馬西王

母獻白環玉玦
朱草生冀莢滋

洛書靈准聽舜受終鳳凰儀黃龍感
孝經援神契王者德至山陵則山出

木根車應載萬物虞舜德盛於山陵故山車出有垂綏
尚書大傳舜以天德嗣堯西王母來獻白玉琯尚

書帝命驗西王母於大荒之國
得益地圖慕舜德遠來獻之

淮南子有虞氏之祀其社用土祀中雷葬成畝其樂咸

池承雲九韶其服尚黃

禮記注鑒輅有虞氏之車也有鑾和之節

管子有虞之王燒曾藪斬犀害以為民利封土為社置

木為閭民始知禮也當是其時民無溫惡不服而天下

化之

淮南子舜作室築牆茨屋辟地樹穀令民皆知去巖穴各有家室古史考舜作瓦棺土豎書序

帝釐下土方設居方別生分類作汨作九共九篇橐飫〇十一篇俱亡

新書帝舜曰吾盡吾敬以事吾上故見謂忠焉吾盡吾

敬以接吾敵故見謂信焉吾盡吾敬以使吾下故見謂

愛焉是以見愛親於天下之民而見貴信於天下之君

故吾取之以敬也吾得之以敬也故欲明道而諭教唯以敬也故欲明道為忠必服之

尸子有虞之君天下也使天下貢善商周之君天下也使天下貢財其治天下見人有善則如已有善見人有

惡則如已有惡此有虞氏之盛德也

帝王世紀舜立諱謗之木

象黃金於蘄巖之山禹捐珠玉於五湖之淵將以杜邪淫之欲絕琦瑋之情

韓詩外傳舜甑盆無臙而下不以餘獲罪飯乎土盥啜乎土型而農不以力獲罪麤衣而盤領而女不以巧獲

罪法下易由事寡易為功而民不以政獲罪故大道多容大德衆下聖人寡為故用物常壯也

呂氏春秋舜之耕漁其賢不肖與為天子同其未遇時也以其徒屬掘地財取水利編蒲葦結罟網手足胼胝不居然後免於凍餒之患其遇時也登為天子賢士歸之萬民譽之丈夫女子振振殷殷無不戴說舜自為詩曰普天之下莫非王土率土之濱莫非王臣所以見盡有之也盡有之賢非加也盡無之賢非損也時使然也

尸子舜之陶也不能利其巷
南面而治天下則蠻夷蒙福

尸子舜南面而治天下天下太平調於玉燭息於永風
食於膏火飲於醴泉舜之行其猶河海乎千仞之谿亦
滿焉螻蟻之穴亦滿焉由此觀之禹湯之功不足言也
書三載考績三考黜陟幽明庶績咸熙分北三苗帝
庸作歌曰勅天之命惟時惟幾乃歌曰股肱喜哉元首
起哉百工熙哉臯陶拜手稽首颺言曰念哉率作興事
慎乃憲欽哉屢省乃成欽哉乃賡載歌曰元首明哉股

肱良哉庶事康哉又歌曰元首叢脞哉股肱惰哉萬事墮哉帝拜曰俞往欽哉

高士傳善卷者古之賢人也堯北面師之及舜又以天下讓卷卷曰昔唐氏之有天下不教而民從之不賞而民勸之今子盛為衣裳之服以眩民目繁調五音之聲以亂民耳丕作皇韶之樂以愚民心天下之亂從此始矣予立於宇宙之間冬衣皮毛夏衣絺葛春耕種秋收斂逍遙於天地之間而心意自得吾何以天下為哉遂

不受去入深山莫知其處

莊子舜以天下讓其友北人無擇北人無擇曰異哉后之

為人也居於畎畝之中而遊堯之門不若是而已又欲以其辱行漫我吾羞見之因自投清泠之淵舜以天下讓其友石戶之農石戶之農曰捲捲乎后之為人待力之士也以舜之德為未至也於是夫負妻戴攜子以入於海終身不反也舜讓天下於子州支伯子州支伯曰子適有幽憂之病方且治之未暇治天下也故天下大器也而不以易生此有道者之所以異乎俗者也尸子蒲衣子八歲舜讓以天下莊子舜問乎丞曰道可得而有乎曰汝身非汝有也汝何得有夫道舜曰吾身非吾有也孰有之哉曰是天地之委形也生非汝有是天地之委和也性命非汝有是天地之委順也孫子非汝有是天地之委蛇也故行不知所往處不知所持食不知所味天地之強陽氣也入胡可得而有邪○列子同尸子務成昭之教舜曰避天下之逆從天下

之順天下不足收也避天下之順從天下之逆天下不足失也拾遺記冀州之西二萬里有孝養之國其俗人年三百歲而織茅為衣死葬之中野百鳥銜土為墳犀獸為之掘穴不封不樹有親死者刻木為影事之如生其俗驍勇能鬪金石其舌抄方而本小手搏千鈞以爪畫地則洪泉湧流善養禽獸入海取虬龍育於園室以充祭祀昔黃帝伐蚩尤除諸凶害獨表此處為孝養之鄉萬國莫不欽仰故舜封為孝讓之國舜受堯禪其國執玉帛來朝特加賓禮典於餘戎狄也

帝王世紀娥皇無子女英生商均

呂氏春秋舜有子九人山海經有人三

身帝俊妻娥皇生此三身之國姚姓黍食使四鳥帝俊生三身三身生義均義均是始為巧倭是使作下民百巧舜妻登比氏生宵明燭光處河大澤二女之靈能照此所方百里一曰登北氏帝舜生戲戲生搖民

有載民之國帝舜生無淫降載處是為巫載民巫載民盼姓食穀不績不經服也不稼不穡食也爰有歌舜之鳥鸞鳥自歌鳳鳥自舞爰有百獸相羣爰處百穀所聚

書舜生三十徵庸三十在位五十載陟方乃死

史記舜年二十以孝聞年三十堯舉之年五十攝行天子事年五十八堯崩年六十一代堯踐帝位踐帝位三十九年南巡狩崩於蒼梧之野葬於江南九疑是為零

陵

帝王世紀舜以堯之二十一年甲子生三十一年甲午徵用七十九年壬午即真百歲癸卯南征崩於鳴

條殞以瓦棺葬於蒼梧九疑山之陽是為零陵謂之紀市皇覽舜冢在零陵營浦縣其山九谿皆相似故曰

九疑 論衡舜葬蒼梧象為之耕 山海經蒼梧之山
帝舜葬於陽帝丹朱葬於陰 赤水之中有蒼梧之野
舜與叔均之所葬也爰有文貝離兪鴟久鷹賈委維熊
羆象虎豹狼視肉 拾遺記舜葬蒼梧之野有鳥如雀
丹州而來吐五色之氣名曰憑霄雀能羣飛銜土成丘
墳此鳥能反形變色在木則為禽行地則為獸時來蒼
梧之野銜青砂珠積成壘阜名曰珠丘其珠輕細風吹
如塵起名曰珠塵服之不死帶者身輕故仙人方回遊
南岳七言讚曰珠塵圓潔 輕且明有道服者得長生

墨子舜西教乎七戎道死葬南己之市衣衾三領穀木

之棺葛以緘之己葬而市人乘之

呂氏春秋舜葬於紀市不變其肆 建異

記會稽山有虞舜巡狩臺臺下有望陵祠帝舜南巡葬於九疑民思之立祠曰望陵祠

禮記舜葬于蒼梧之野蓋三妃未之從也

○檀弓列女傳舜陟方

死於蒼梧二妃死於江湘之間俗謂之湘君博物志堯之二女舜之二妃曰湘夫人帝崩二妃啼以涕揮竹竹盡斑水經注大舜之陟方也二妃從征溺於湘江神遊洞庭之淵出入瀟湘之浦

匹夫而有天下自舜始也堯知其子之不肖以為授賢則天下利授子則丹朱利而天下病終不以天下之病而利一人故授舜而不疑至公也舜在側陋以純孝格親玄德升聞岳牧咸薦使之主事而事治使之主祭而鬼神享謳歌訟獄雖欲避之而不能也至

德也當是時俊乂登朝化洽四海賡歌喜起揖讓廟
堂之上有更姓之名而無改物之實故唐虞猶一家
也非甚盛德而能若此乎據史記所敘黃帝以至三
王皆同族異號舜亦黃帝苗裔蓋堯之羣從玄孫屬
也先儒非之曰以堯舜為同族則二女之妻幾於嬪
姓亂序舜為父母所惡屢瀕于死耕稼陶漁必待四
岳之薦而後用則不得謂之九族既睦故路史考據
國語以為舜之系出於虞幕五帝之中獨不祖黃帝

其說甚備可謂信而有徵矣余因是而反覆詳究不獨舜不祖黃帝即顓頊亦不當祖黃帝既顓頊不祖黃帝則夏后氏亦不當祖黃帝矣曷言之國語史伯之言曰成天地之大功者其子孫未嘗不章虞夏商周是也虞幕能聽協風以成樂物生夏禹能平水土商契能和合五教周棄能播殖穀疏其後皆為王公侯伯左傳史趙之言曰自幕至於瞽叟無違命舜重之以明德是舜之祖幕審矣國語又曰幕能帥顓頊

者也左氏傳又曰陳顓頊之族也是幕之祖顓頊亦
審矣史記之誤由於輕信世本果如世本所言黃帝
至堯五世至舜則九世顓頊至禹三世至舜則七世
何舜獨年代之數而堯禹年代之曠邪蓋世本一書
出於周末采記前代之世次必多遺脫史記用之而
不知察也周歷千餘年而十五世論者皆知其疎矣
堯禹之祖能必其不疎乎少昊之為帝史且遺之矣
諸世代之微者能必其不遺乎雖然世代之疎漏則

有之矣至如窮蟬以下諸名必非鑿空增設再加以
虞幕而幕又未必卽顓頊之子窮蟬之父也若是則
舜之世代與堯禹益相懸絕矣何能同時授受余故
知前代之世次必有遺脫也抑嘗考之漢書曰黃帝
之子清陽其子孫名摯以金德王號曰金天氏是少
昊氏乃黃帝之後裔而非其子也國語曰少昊氏之
衰九黎亂德顓頊受之蓋少昊氏一代之通稱非當
其世而遽衰也然則顓頊之去黃帝中間曠隔何得

為黃帝之孫而昌意之子山海經言黃帝生昌意昌
意生韓流韓流生顓頊韓流或作乾荒按山海經所
載古帝子孫率多簡略安知乾荒之外不更有所遺
乎且顓頊與帝嚳亦未必親相接承也不知傳歷幾
世而後高辛氏興將帝嚳上至黃帝又不止三世而
已矣古者帝王一代之興必建立名號至如世及相
承則因之而不改故太皞十五世皆襲庖犧氏之號
神農八世皆以炎帝稱何獨黃帝之後伯仲子孫遞

相授受必世世殊稱易運而列為五帝也哉春秋命
歷序曰黃帝傳十世少昊傳八世顓頊傳二十世帝
嚳傳十世此雖緯識雜說不足深信然而足以補遷
史之疎濟諸說之窮似未可盡棄也又漢書帝系曰
顓頊五世而生鯀則鯀非顓頊之子是夏之上世史
有遺脫矣左傳稱高陽氏之才子八愷高辛氏之才
子八元此十六族者世濟其美若即為二帝之子則
高陽八子何其壽高辛八子豈其堯之諸弟邪蓋二

氏之族黨猶言顏氏有八賢也故杜氏注云皆其苗裔夫高辛之苗裔堯未能舉是嚳堯亦非父子相承或高辛氏歷世既久及摯而衰堯始起而代之是堯之上世史亦有遺脫矣若此則唐虞夏后之世代可以相值即曰堯舜同出於黃帝固已曠代疎絕猶魯之與宋秦之與趙也傳曰黃帝之子二十五人同姓者二人而已異姓則異德男女相及以生民也記曰繫之以姓而弗別雖百世而婚姻不通者周道然也

若如魯宗秦趙久為異姓別宗則堯亦何嫌於二女之嬪虞而又何必疑於舜之降在匹庶堯不能親睦也哉至於禘郊祖宗之制則禮有明文矣大傳曰禘者禘其祖之所自出以其祖配之况神不歆非類禮不祭非鬼有虞氏之禘黃帝而郊嚳祖顓頊而宗堯也其於報親紹堯之義兩不相違不必攻戴記之失而曲折言之固已暘然矣不然疑舜之祖將竝疑高陽夏后氏之祖夫豈史遷同族異號之說茫然無所

原本而肆為妄謬以待後人之摘發哉惜乎諸儒疑
統系之舛而未及察世代之疎仁山金氏發其端而
未究其所以然也

繹史卷十